

MEDITATIONES
AD
QVAESTIONEM
VTRVM METHODVS
DEMONSTRATIVA SIVE
MATHEMATICA IN IVRISPRV-
DENTIA CIVILI ADHIBERI
POSSIT?

PRAEMISSAE
COLLEGIIS PROXIME APERIENDIS

AD QVAE
CIVES

HVIVS

ACADEMIAE FLORENTISSIMOS
EA QVA PAR EST OBSERVANTIA

DECENTER
INVITAT

GOTFR. HENR. ELEND,
I. V. L.

KILONII, LITTERIS GODOFR. BARTSCHII,
CIO MDCC XXXV.

§. I.

Quantum intersit eorum, qui Musis nomen dederunt, quo ordine a docentibus scientiae tradantur, & quam vere dictum sit a PLATONE, diuini ingenii Philosopho in *Gorgia: methodum animam esse scientiarum*; nulli ignotum esse poterit, qui vel leuiter tinctus est praeceptis artis ratiocinandi. Sane Vir Celeberrimus WOLFFIUS, eruditae Germaniae ornamentum, non vno loco summam demonstrauit utilitatem, quam ii sentiunt, qui scientias methodo didicerunt demonstratiua, nexumque veritatum propositarum cum indubiis inspexerunt principiis, prae iis, qui vel nullam, vel remotiorem dogmatum suorum rationem afferre possunt, & cerebellum non nisi vagis & confusis repletum habent notionibus. Nolo huius Viri expilare scripta, quae in omnium versantur manibus, quaeque digna sunt, vt accurata animi intentione peruoluantur: Nolo inquam, cum res omni dubio careat. Quis enim nescit? limites ingenii nostri strictiores esse, quam vt veritatem singularium propositionum cognoscere possit, sed tum demum de veritate earum conuinci, cum nexum earum cum aliis indubiae veritatis perspicit. Immo si quis putaret, perinde sibi, saltem in quibusdam scientiis (*) esse, quo ordine dogmata, dummodo vera, proponantur; is modo perpendat per methodum demonstratiuam, Mathematicam siue Philosophicam

(*) *Vid. Wolfium in der Nachricht von seinen Schreiffen* s. 3.

cam (*) singulas theses ad generaliora principia ope definitionum reduci, adeoque eam memoriae optimo esse adiumento, cum nonnisi pauciora definitionis verba, sua veritatis luce corruscantis, retinere debeamus, ad caetera, quae de re definita dici possunt, resoluenda. Atque hae utilitates methodi demonstratiuae cum tam euidenter in oculos incurrant, ut merito in omnibus scientiis adhibeatur, quibus id fieri possit: etiam ab Ictis quaesitum est, an ista methodo scientifica Iurisprudentia nostra Romano-Germanica tradi possit, id quod a Celeberr. WOLFFIO summa confidentia assertum (†), et a Clar. CRAMERO quibusdam speciminibus tentatum est, quibus Illius sententiam comprobasse sibi videtur. Huic opinioni cum sese, tum alii, tum etiam nuper Ill. LVDEWIGVS Hallensis opposuerit, hanc methodum tanquam prorsus alienam a Iurisprudentia reiiciens, eius adoratores exhibilans, moreque suo in eos, a quibus dissentit, nimis acerbe inuehens: paucis inquiramus, an methodus haec demonstratiua applicari possit ad Iuris scientiam conscribendam et explicandam, vel an ea felicitate, qua Mathematicus superbit, Ictis carere debeat?

§. II.

Iurisprudentia nimirum duabus absoluitur partibus, quarum prior circa accuratam Legum cognitionem adipiscendam, altera circa earundem aptam ad negotia ciuilia applicationem versatur. Iam ergo hic quaeritur? an ad priorem partem perdiscendam tale confici possit Systema Iurisscientiae, in quo leges omnes et singulae, quae adhibendae sunt in decisione controuersiarum, ex indubiis iactis principiis, de-

A 2

finitio-

(*) Haec synonyma esse probauit Wolffus *Log. disc. prael.* §. 139.

(†) In *hbris subseciuis anni 1731. Spec. 2. trim. brumal. et Dec. 2. trim. aestiu.*

initionibus harumque evidenti comparatione deductae & demonstratae appareant. (*) Etenim, qui demonstratiua methodo, a Mathematicis maxime vsitata, vti gloriatur, caueat, vt vllam in compendio suo admittat thesin, quae non ex indubiis axiomatibus, quo spectant propositiones alio loco demonstratae, euidentissimis experientiis, vel definitionibus exasciatis, harumque comparatione induci posset. (*) Iam vero, inquirunt propugnatores methodi scientificae, (†) in Iurisprudentia ciuili locum principiorum, axiomatum indubiae veritatis occupant ea, quae ex Iure N. et Politica desumpta ibidemque demonstrata sunt. Deinde definiri posse entia Iuridica in dubium vocari nequit, cum alias voces in iuris scientia occurrentes forent sine mente meri sonus, quod nemo Ictorum concessurus est. Praeterea pergunt, cum ad definitionem conficiendam requiratur, vt ea, quae subiecto definiendo absolute conueniunt, nec tamen a se inuicem determinantur, seligantur, et tot praedicata ex hisce colligantur, quae simul sumta non nisi huic vni subiecto propria sint; nec adeo difficile foret homini, in his negotiis versatori, in Iurisprudentia tales proponere. Euoluantur enim modo Leges rationis et positiuae, debita attentione et meditatione perlegantur, ea notentur, quae subiecto a legislatore sunt attributa. En glorianatur, euadet definitio! quae vicem principii demonstrandi sustinebit. Nec enim eas retinere cogimur definitiones, quae in Iuris corpore passim occurrunt. Definitiones condere est Philosophi, Philosophi Icti. Legislatoris officium tantum est, ea declarare et praecipere, quae de subiecto dici cupit.

§. III.

(*) Scilicet quaestionem & statum controuersiae ex mente Wolffii, cum quo nobis res est, formamus.

(**) vid. Wolffii Logic. §. 498.

(†) vid. Wolffium Hor. subsec. spec. al. trim. brum. §. 2. seq.

§. III.

Satis egregie haec dicta esse, magnamque prae se ferre speciem videntur, et utinam Iurisprudentia ad eum certitudinis gradum deduci posset! sed vereor, ne in votis subsistamus. Primo enim ea, quae de definitionibus in medium afferuntur, paulo accuratius ut inspiciamus; falsum est omnis generis definitiones principia demonstrationum constituere, sed eae demum, quarum realitas (*), i. e. quod etiam certo et semper definito ea competant, quae nos de eo enunciauimus, demonstrari potest. Scilicet definitiones duplicis sunt generis. Vel enim experiundo (†) et sola mentis accurata reflexione eruuntur, ita, ut indubiis experienciis euidentibus perceptionibus vel abstractionibus adstrui possit, ea reuera definito competere, quae nos definiendo ei attribuimus. Quae propositiones principia demonstrandi quo minus essent, quis dubitaret? cum sint certo verae, ex quibus adeo certo verum elici potest. Tales sunt definitiones mathematicae, circuli &c. tales sunt iurisprudentiae N. definitiones. e. g. contractuum, ut ideo nullus dubitem, quin ista disciplina iuxta rigorem mathematicum probari queat. Vel definitiones ita sunt comparatae, ut quaedam contineant & continere debeant, quae naturaliter subiecto non insunt, etsi eidem non contrariantur, adeoque nec per solam reflexionem indagari possunt; sed quae adiecta sunt vel ex meo vel alterius arbitrio (**). Tales fere omnes sunt definitiones iuris Ciuilis, scilicet quae addendo vel mutando oriuntur. Lex enim ciuilis accuratius determinat, vel addendo certa requisita et circumstantias, vel limitando placita Iuris N., quae deinde etiam adiaci debent definitionibus Iurisp. Nat. ad defini-

A 3

tiones

(*) *vid. Heinccii Logie. p. 1. c. 2. Sect. 3. §. 43. Wolfii Logie. §. 790.*

(†) *vid. Heincc. d. l.*

(**) *vid. Heincc. §. 42, d. l. sequ.*

tiones Iurisprudentiae ciuilis habendas. Ita Ius Naturae pariter ac ciuile stabiliunt: pacta esse seruanda; sed quid sit pacisci, consentire, vsum rationis habere, accuratius arbitrario modo determinat Ius Ciuile. Vt ergo hae definitiones principiorum vice fungerentur, necesse esset, vt earum existentia, adeoque adiectio circumstantiarum arbitrariorum demonstraretur per ante dicta, cum alias hae definitiones, quales in demonstrationibus solae occurrere debent, locum occupare non possent. At vero hoc est impossibile. Cur? dum enim Princeps legislator aliquid addit notionibus Iuris N., aliquid facit; facta vero humana demonstrari nequeunt, sed tantum probari. Ergo nec realitas definitionum in iure occurentium. Ex quo quid aliud efficitur? quam definitiones iuris ciuilis haud ita esse compatatas, vt principia demonstrandi esse possint, potius hypothesium instar inter probabilia esse referendas, (†) adeoque methodo demonstratiua Ius Ciuile non posse tradi (*). Nec enim mihi quis obiiciet: Voluntati Principum esse standum, adeoque quod ille circa negotia humana statuit, ad essentiam eorum certo pertinere. scio enim in thesi hanc verissimam esse enunciationem, in Iure N. demonstratam, in Iure Ciuili axiomatis instar habendam: *Quicquid Princeps ad essentiam contractus vel negotii pertinere voluit, illud includi definitioni debere*: sed in hypothesis an hoc vel illud ad essentiam contractuum referre voluerit, quis hoc demonstrabit? Sane si hoc possibile esset, nullum inter Ictos dubium foret de Legibus incertae auctoritatis, i. e. an nobis sint leges, (lex enim vocabulum relativum est) c. g. de *Auth. Sacr. Pub. de Constit. FRIDERICI II. de re tractu*. Quod quemadmodum in optimis saepe rebus publicis contingere potest, praesertim in contentione legis et consue-

(†) *vid. Gundling. Continuata. p. 3.*

(*) *Wolf. Log. §. 587.*

fuetudinis, tum praefertim in nostro imperio ob incertitudinem Iuris et concursum LL. Romanarum, Pontificum et Germanicarum, id quod exemplis sexcentis illustrare facillimum esset, si programmatis limites egredi volupe esset. Et quid pluribus? Tota Iurisprudencia in eo versatur, vt legislatoris sensum eruamus et assequamur, hunc vero tantum probabiliter posse erui quis nescit, nisi hermeneutices ignarissimus? At vero hic obiiciunt Viri Celeberrimi WOLFIVS et CRAMERVS dicentes: Legum Ciuilium determinationes non solum a voluntate principis dependere, sed Politicam eam esse scientiam (†), quae demonstrat, quid addi, quid demi debeat Iuris Nat. placitis, ex earum ergo disciplinarum penu desumenda esse argumenta; praeterea adesse rationes, cur hoc vel illud princeps statuerit, per quae demonstrare possent leges datae. At vero vt breuissimis respondeam. Politica quidem docet, quid vtile sit, vt addatur vel dematur, sed Ictus sollicitus, est de eo, quod actu demtum est & additum; ergo illo demonstrato, hoc tamen nondum est demonstratum. Fac ex Politica demonstrari posse, expedire publico bono, vt minori cum curatoris consensu etsi facta alienatio immobilium rescindatur: num ergo statim necessario iuxta veritatem istam Politicam Ictus decedit, etsi lege nondum data? E contrario fac ex Politica clare demonstrari posse Legem esse iniquam duram (*) imprudentem, num ideo nos haud obligaret? vid. L. 12. Qui et a quib. man qua expresse dicitur: Lex etsi dura, tamen est scripta. Rationes Politicae illustrent theses iuris, aequitatem comprobant, non vero demonstrant, vt sine iniustitia hae determinationes abesse nequeant. Dein possunt quidem dari rationes Legum ciuiliu, cur hoc princeps voluerit, id quod

virget

(†) Wolffius in boris subsec. Sp. 2 §. 3. anni 1731. Trim. brum.

(*) Tales vero dari in nostro Iurispr, probat Kress, de iure summo summa iniuria.

vrget Dn. CRAMERVS, sed hae non sunt necessariae, id quod tamen ad demonstrationem requireretur, quae ratiocinatur per necessè, quid? quod, saepe pessimae rationes Legislatorem commouerint ad legem bonam promulgandam. Dari potest ratio, cur in emtione venditione immobilium resignatio iudicialis vtiliter adhibeatur, sed an haec ideo necessaria est, vt etiam resignatio iudicialis Lege stabiliri debeat? Tandem rationes, quae communiter afferuntur, sunt generaliora axiomata et dogmata Politices, quae in se satis firma nituntur veritate, sed quod etiam recte applicata sint, id demonstrandum foret. e. g. si quis dare rationem vellet stipulationis Romanae, is recurrere deberet ad axioma politicum; *quod Reipublicae intersit, vt contrahentium mens sit perspicua ad litium occasiones e Republica exterminandas* (*). Sed iam probandum esset, stipulationem optimum fuisse remedium, quo litigandi pruritus tolli, litesque praecidi potuerint. Quam difficile hoc foret; facile quivis perspiciet, qui modo secum reputet, quot fraudibus et circumventionibus haec ipsa stipulatio originem et causam dederit, adeo, vt iis medendis Praetor varia remedia pedetentim excogitare debuerit. Ex quibus tandem omnibus luce meridiana clarius elucet, Iurisprudentiam Civilem respuere ea principia, quae ad demonstrationem, ad methodum demonstratiuam, ex ipsius WOLFII iudicio requiruntur,

§. IV.

At vero simus liberales (†); supponamus voluntatem Principis Legislatoris tam euidenter, tam clare esse promulgatam,

(*) Heineccii *Orig. de Iurispr. formulae*.

(†) Scilicet Vir Celeberrimus non solet recedere a semel recepta significatione; At vero sequentibus probare annititur, ne quidem demonstratiuam methodum sensu latiori, quo alii vocem usurpant, in iura locum inuenire.

gatam, vt de ea nemo sanus dubitare, adeoque realitas definitionis demonstrari (voce latiori sensu sumta) (*) queat: nonne tum Iurisprudentia Ciuilis methodo demonstratiua pertractari posset? Fateor, etiamsi rigor Mathematicus semper exularet, tamen admissa definitionum certitudine demonstrationes necesse posse (**); adeoque talem Iurisprudentiam hoc sensu non omnino esse impossibilem (†), etsi in hoc orbis systemate, ob variam et mutabilem Legislatoris voluntatem, vix sperandam. At verò si nostrae Iurisprudentiae in Academicis tradendae, ex Iure Romano, Canonico et Germanico collectae faciem considero, tantum abest, vt eam tali methodo, demonstratiuam imitante, tradi posse existimem; vt nec solum id, quod Corpore Iuris continetur, isto ordine doceri posse, audaacter affirmem. Primo enim certissimum est; dari in Iure Iustiniano antinomias et propositiones directo sibi contradicentes (††), quas conciliare nemo nisi

B

Alexan-

(*) *Etiamsi definitiones iuris ciuilis et arbitrarii semper ad probabilia tantum sint referendae, saltem ex mente Wolfi ob supra dicta: dantur tamen probabilitates, quae quam minimum a certo vero distant, vid. Heinec, Logic, P. I. c. 3. §. 10, Cel. GENTZK. artem rationandi, Heumanni Aëta Philosoph. de fide historica, Ditton. de veritate religionis Christianae, Igitur putare quis posset, si definitiones cum probabilitatis tantum gradum attingerent, tunc demonstratiuam methodum adhiberi posse. sed hoc suppositum respectu nostrae Iurisprudentiae negaturi sumus.*

(**) *Ita e. g. definitione consensus ex mente Iuris Romani, et negotiorum gestorum quasi contractus pro certo vera assumpta, demonstrari posse sentio: prodigum consentientem vel expresse mandantem ob negotia eius gesta, non actione mandati, sed negotiorum gestorum conueniri debere.*

(†) *vid. Wolff. Horns subsec. d. l. Sp. 2. §. 3.*

(††) *Superuacaneum esse puto, hanc rebin, ab aliis probatam, pluribus argumentis confirmare vid. Perill. VOGT. Diss. de arduo lu-*

Alexandrum gladio nodum gordium rumpentem imitans poterit, et quibus conciliandis nec regulae politicae sufficiunt ob supra dicta. Nec obstat huic veritati, quod CRAMERVS obiicit: Iustinianum tamen intendisse consonantiam Iuris L. 1. §. 8. de vet. iur. enucl. Voluntatem Imperatoris laudamus, sed Ei, vel potius collectoribus ministris vires defuisse vel debitam industriam, res ipsa loquitur. 2) Occurrunt Leges ex diuersis Hypothesibus demonstrandae, quas Tribonianus ex incuria suae farragini inseruit. Ita e.g. recepta et admissa hypothesi Iuris: *Neminem in alterum plus iuris transferre posse, quam ipse habet*: demonstra, quaeso, ex hac veritate admissa: *Emtori nouo facultatem competere expellendi conductorem, quam venditor tamen ipsi conferre non potuit* (*). 3) Nemo inficias ibit; multas Leges obscuritate laborare, et (†) Legislatorem mentem suam non satis determinatam explanasse, quod quidem saepe numero non tam Legislatori quam tempori vitio vertendum esset. Vt vulgare exemplum afferamus, quo sententiam nostram probemus, da mihi, quaeso, definitionem

dicantium officio §. 7. Exempli loco sit L. 15. de R. C. L. 34. M. de quibus Vinnius in sel. quaestionibus l. 1. c. 11.

(*) *Adde Voet. ad L. Commiss. Eodem pertinet differens decisio, qua Iustinianus usus est in materia commixtionis frumenti, et nummorum, vid. §. 28. L. de A. R. ibique Vinnium et L. 78. de solut. KRESS. de iure summo §. c. c. ult. §. 1. not. 2.*

(†) *Exempla innumera dare possemus, nisi breuitati studeremus, vid. L. 12. C. de Legibus, quo ipse Imper. id fatetur. adde Cuiacium de Papiniani et Pauli obscuritate querentem, Bertrandum in vita ill. Zafium in paratilis ad D. de acc. usufructu alienem: hunc titulum transcamus suspenso pede, quia plenus est vepribus, item Huberum praef. ad ff. tit. de conditione triticiaria, quam materiam adeo esse difficillimam, affirmat, vt processus ex isto negotio prouenientes diabolicos, non nemo vocarit.*

nem arrhae, per quam ex mente Iuris Romani decidantur quaestiones, vtrum arrha signum sit perfecti contractus, an reservatae poenitentiae et facultatis resiliendi a contractu? vid. LAVTERBACH. de arrha. Perill. LEYSER Med. spec. 204. VINNIVM ad I. Ex quibus tandem omnino sequitur, vt definitiones Iuris Romani ne quidem ita componi possint, vt summum probabilitatis gradum attingerent. De Axiomatibus Politicis forsan ad haec obstacula remouenda haud sufficientibus ob supra dicta lubenter taceo, id vnum nunc adiciens: Ius Romanum iniquis quibusdam (*), et parum prudentibus scaterere legibus, quarum veritatem ex saniori Philosophia nullo modo probare poteris, sed contrarium potius, quod vltimum si faceres, optimum conderes ius, male vero connecteretur methodo demonstratiua placita Iuris Iustiniani. Ita demonstres mihi velim ex regulis politicis, veritatem L. 2. C. ad L. Iuliam de adul. qua mulieres istae a Iudiciaria severitate stupri et adulterii immunes praestantur, quae in cauponis et tabernis potantibus ministeria praebent. Si hoc effeceris tum demum Decium Ictum recte iudicasse credam, qui Lege citata corruptus statuit, *mercetrem plane cogi posse, ut corporis sui copiam petentibus concedat, quia instar sit diversorii, in quo viatores etiam invito caupone hospitantur.* vid. ANTON. MATTHÆI de Crimin. p. 409. Ratio quidem haec crassa est, et absurda: sed Politica, quae Legem allegatam demonstratura est, hanc opinionem firma niti veritate forsan monstrabit.

§. V.

At vero, si et his vitiis, quibus Ius Romanum laborat, medela esset allata, si Ius Iustinianicum in systema methodo

B 2

ma-

(*) vid. Celeberr. KRESS. Dissertat. de Iure summo summa iniuria.

mathematica conscriptum, esset compactum. quid inde? quid tale systema? quid definitiones ex mente Iustiniani confectae (*) prodesse Themidi operam nauanti? Cum nostra Iurisprudentia Civilis, quam discentes a docentibus sibi explicari postulant inglomerabilis sit cinnus ex Romano-Iustinianis, Pontificum, Longobardorum, ipsorum denique statuum imperii nostri Legibus congestus, cuius compendium et systema esset conscribendum. Sed instas forsan, ex hoc nihil aliud inferri, quam ut definitiones non ex solo iure Romano, sed ex Iure recepto essent efformandae. At ne dicam, ipsa iura praedicta iisdem laborare naevis, quae in iure Romano notauimus (**): incertissimum saepe est, cuiusnam iuris in hac vel illa materia auctoritas praeualeat (†), ita, ut in tanta iuris incertitudine dubius animus saepe haereat, quam opinionem amplectatur, ex quibus definitiones conficiat, ita ut definitionum realitas non solum non demonstrari, sed ne quidem ita probari queat, ut medium probabilitatis gradum pertingat. Huc accedunt commentatorum ingentia volumina, opinionum communium, quibus aliae contrariantur, obseruantia, quae tamen non omnino sunt negligenda, tum inprimis, si Legislatores mentem satis determinate haud explicauerint, id, quod facile illustrare possem, si luberet, exemplo iuris retractus gentilitii. Tandem, si iam tale compendium iuris communis exstaret: num etiam Saxo, Holsatus, Lubecensis, omnes etsi Germani, ideo ex Tuis definitionibus deducere valerent et demonstrare, quid iuris

(*) *vid. Thomasi diff. utrum LL. Iuris Iustiniani sit frequens, an exiguus usus.*

(**) *vid. Kress. de Iure summo.*

(†) *vid. Gribner de iure incerto ex dubia Legum, quibus utimur, auctoritate oriunda.*

iuris sit in cuiusvis nominati provincialibus foris? Scilicet tale compendium iuris, etsi summa diligentia collectum, et politis rationibus corroboratum, tamdiu sua niteretur veritate, quamdiu Principi haud placuisset, novis Legibus priores antiquare. Hoc facto omnes Tuae veritates operose ex opinione Tua demonstratae corruerent, vera iam falsa euaderent, certissimo indicio; id proprie demonstratum esse dici non posse, quod alio tempore falsissimum esse probare queo.

§. VI.

Sed nolo plura facere verba de re, quae sua radiat euidencia, quam ipse WOLFFIVS olim agnouit (*), etsi deinde sententiam mutauerit horis subseciuis, ita, vt iunior seniore WOLFFIO hac in parte videatur sapientior. Systema Iurisprudentiae Romano-Germanicae, quale in collegiis Iuridicis fundamento ponitur, methodo demonstratiua conscriptum, ita, vt nulla in eo reperiatur thesis, quae ex ante iactis principiis necessario haud fluat, et quod sufficiat omnium negotiorum in foro occurrentium decisioni, inter impossibilia refero. Caeterum absit a me suspicio, ac si Istorum magni nominis BOHMERI, HEINECCII aliorumque labores vllomodo floccipendendos esse censerem, vtpote qui in compendiis iuris definitiones accuratiores praemittere, indeque plures deducere veritates studuerunt, etiamsi nec sibi vitio verti posse recte iudicarunt, quasdam apponere theses, quas nuda allegatione Legis vel obseruantiae probare satis duxerunt. Tanta laude sunt afficiendi ii: quantam ii merentur docentes, qui explicatis definitionibus, et si opus est, emendatis, ex harum comparatione placita Legislatorum rationibus Legalibus demonstrant, quale exemplum supra dedi-

B 3

mus

(*) *Präfat. von den Kräften des Verstandes.*

mus, simulque rationes Politicas et Historicas adducunt ad Legum vtilitatem et aequitatem probandam.

§. VII.

Habet haec methodus maximam vtilitatem (*), et longe superat eam, qua nil nisi theses sine connexionione, sine definitionibus lectori et discendenti obiicitur. Imitemur ergo in Iurisprudencia condenda et tradenda Mathematicos (**), immo Aristotelicos potius, quam Stoicos in definiendo negligentiores (†). Id enim tantum nunc innuo, nec definitiones in iure nostro posse confici ex omni parte accuratas, ita, vt omnia includant, quae de re definita praedicari, et exinde vel per immediatam vel per mediatam consequentiam elici queant;

(*) *Vid. HEINECCII praef. Element. Iuris C.*

(**) *Non possum non, quin hic addam, me initio putasse Celeb. WOLFFII et CRAMERI eandem fuisse sententiam, dum methodum demonstratiuam in iure adhibendam esse inculcarunt, praefertim, cum ipse WOLFFIUS Log. §. 5. recte asserat, probationem probabilem non forma, sed tantum principiis differre. Putaram, inquam, illos requirere tantum definitiones quantum fieri potest accuratas, ex quibus varias iuris theses tanquam theoremata adstruere possent, quae probationes tamdiu verae fuissent, quamdiu realitas definitionis admissa esset. Quae quidem si fuisset sententia horum virorum, nihil eis obiiciendum esse perscicio. At vero longe aliam sententiam esse WOLFFII et CRAMERI cuius patebit, qui §. 2. Specimin. 2. d. l. horarum subsec. inspicit et praeterea notionem sibi format, quam de methodo sine forma demonstratiua explicat in den Unterrichte von seinen Deutschen Schrifften. c. 1. §. 1.*

(†) *Aliter sensit olim Vir Perillustis A. LEYSER in Dissert. de Logomachis in Iure, sed opinionem hanc mutasse videtur in Medit. ad ff. spec. I. quo ipse Stoicorum adeoque veterum Iurorum definitiones ridet, et ad meliores conficiendas hortatur; adde Schilkeri Praxin Analyticas, Nelden. Vsum Org. Aristot.*

queant; nec earum realitatem demonstrari, saepe nec sufficienter probari, vno verbo, vniuersum ius concatenata propositionum serie tradi haud posse, adeoque nec methodo demonstratiua; siue seriem titulorum Institutionum et Pandectarum retineamus siue non.

§. VIII.

Atque haec quidem sufficere videri possent pro veritate argumenti, quod tractandum nobis sumimus, adstruenda. At quoniam Viri Celeberrimi specimina quaedam ediderunt, quibus sibi id iam actu praestitisse imaginantur, quod fieri posse docuerunt: videamus paucioribus, an haec res ex voto successerit, et an haec Eorum methodus digna sit augusto demonstratiuae nomine. Dedit, nimirum WOLFFIUS in horis subseciuis specimen aliquod, quo tit. I. de Iure personarum hac methodo ita pertractasse sibi videtur, et quidem eo simul ordine, qui isti Methodo est arbitrarius, et quo Mathematici uti solent, nempe nominibus axiomatum, Scholiorum Coroll. adscriptis, quod quidem in systemate iuris sine affectatione nec applicari, nec a legentibus sine nausea perlegi posset. At videamus ipsam demonstrationem! Demonstrare nititur; *bello captos fieri seruos*: (*) Quomodo? Scilicet operose demonstrat, non esse contra rationis praecepta, si eum, quem occidere possumus, sub servitutem redigamus. At vero haec thesis 1) demonstranda est in Iure N. non in Iure C. 2) est tantum Iuris permissiuum, vt ipse fatetur. Non ergo ea stabilita, statim demonstratum est; in statu Ciuili in hac vel illa Republica actu receptum esse, vt bello captus sub servitutem redigatur. Et, vt verbo dicam: in Iure Romano clare probari potest per leges: *bello captum fieri seruum*, nemo sane

(*) Wolffii spec. 3. Hor. subf. Trimest. aestiv. a. 1731.

sane de eo dubitabit, vera ergo thesis est ob clara verba. §. 4. I. de iure personarum, non vero certo vera ob tuam prætenfam demonstrationem, ex qua nihil aliud ego concludere possem, quam Legem allegatam Romanam non pugnare cum iustitia naturali. §. 37. specim. alleg. Idem demonstrare conatus est: *infantem ex serva natum, esse servum*. Quo argumento? scilicet prospexit vir acutissimus, ex iure N. sibi id haud licere, ideo principium postulati instar præmisit: *servitutem in Republica conservari debere*. Sed num hoc principium tanta corruscat evidentia, vt sine ulla demonstratione queat admitti? nonne plures Respublicas omni felicitate fruentes sine vlllo servitutis vestigio, nedum illius, quae ex nativitate oritur, videmus? At dicit vir summo ingenii acumine præditus: est principium Iuris Romani. Sed quid ex inde sequitur? Scilicet, vt haec thesis ideo tanquam veritas admitti debeat, quod Romani eam veram statuerint. Sed hinc clare elucet meram hypothesein, nullo vero modo principium esse demonstrationis. Et præterea, unde hoc scit, quaeso, WOLFLVS: *Romanos hanc hypothesein, vel, vt loqui mavult, principium recepisse?* scilicet ex eo, quod Romani statuerint Lege (†), infantem, ex Serva natum, esse servum. Ergo hanc Legem vsurpare deberemus ad hypothesein Romanam eruendam; et tamen Vir Celeberrimus hypothesei usus est ad Legem istam demonstrandam. Quid est circulum in demonstrando committere, si hoc non est? Sane eiusmodi demonstrationibus longe præstat nuda allegatio Legis, vti Heineccius fecit in casibus praedictis (*).

§. IX.

(†) §. 4. I. de iure personarum.

(*) Imo si rationem posterioris Legis dare vellem, longe melius foret, eam ex alia hypothesei, qua Romani servos vt res respexerunt, desumere vid. Heineccii El. Iur. tit. de iure persf.

§. IX.

Praetermittamus reliqua, et pauca etiam de Speciminibus Dn. CRAMERI differamus, quibus varias materias Iuris demonstratiua protulisse methodo gloriatur. Diligentia summa pariter, ac conatus huius Viri sua laude detrahendi non sunt; optandum potius, vt successus conatui et voto respondere posset. At vero, cum non dubitem, quin vir Celeberrimus eam sentiendi libertatem, qua omnes, litteris operam dantes, frui debent, mihi concessurus sit, affirmare non erubescō, Eum partim scrupulosa et subtili ratiocinatione res, in se faciles, difficillimas reddidisse, id quod specimine de computatione L. Falcidiae probare possem, vt-pote quod etiam iis, qui Algebraicis meditationibus assueti, nec earum exosi nauseam procreare aptum est; partim precariis principiis meditationes suas superstruxisse, et hoc modo augustissimum demonstrationis nomen prostituisse, id quod specimine de aequitate Emptionis Spei adstruere queo; partim etiam se non optimum gessisse demonstrationum artificem, dum ex falsis principiis vera demonstrare sit ausus, et ex veris principiis falsas elicuerit conclusiones. Atque hoc vltimum, nequis putet, Virum optimum nos tantum criminari, vt probemus: inspiciamus quaeso specimen suum demonstratiua methodo, si Diis placet, conscriptum de iure principis veniam aetatis concedendi: §. 10. asserit: *Veniam aetatis immediatis imperii subditis et statibus a solo Imperatori concedi. Recte fati.* Ex Legibus imperii enim patet luculenter, hoc reseruatū esse Imperatori, sed CRAMERO non fati fuit, allegando Legem hoc probare, sed a priori hoc vult demonstrare.

C

quod

quod solius sit Imperatoris, dispensationes vniuersales in imperio concedere. At, quis hoc principium in se falsissimum concedet? nisi, qui soli Imperatori Leges vniuersales in imperio condendi potestatem asseret. En quomodo ex principiis ob vniuersitatem falsis vera eliciatur propositio! Sed hocce est demonstrare? Mittamus §. 11. 12. 16. nondum, etsi demonstratas, omni dubio exemptas: mittamus §. 34. qua ob iuramentum beneficium restitutionis minorum cessare affirmat, innitens *Athentica: sacramenta puberum*; cum tamen ipsi, non dico demonstrandum, saltem probandum esset, eam Authenticam, acquitate se haud commendantem nos obligare, vtpote ex Lege Friderici I. Italis, non Germanis data, decerptam, et priuata auctoritate corpori Iuris insertam. Sed respiciamus quaeso §. 31. dictae dissertationis, qua asserit: *veniam actatis, qui adeptus est, a munere tutelae arceri non posse*, quippe quam thesin directio suis cum principiis pugnare video. Nimirum §. 24. ex definitione veniae actatis eruit axioma: *Quaecunque minor facere non potuisset accedente curatoris consensu, ea nec facere potest post impetratam veniam*. Assumam hanc veritatem, iam ego subsumo: Atqui Minor nec consentiente curatore tutelam suscipere potuisset, E. nec eam suscipere potest post impetratam veniam, sed ab ea est arcendus. Maior sua est propositio, Minor adeo clara est, vt Legem allegare pudeat. Et tamen conclusio directio contradicit sua thesi, quam demonstrasse gaudet. Eadem mihi facile esset facienda conclusio ex §. 25. qua demonstrat minorem post veniam impetratam, nec bona sua hypothecae dare posse; quae thesis, si vera, vt est, sane nec minor tutelam gerere poterit. Vid. LAVTERBACH. diff. de hon. tut. HOPPIVM ad I. En ergo ex veris prin-

principiis male elicitam conclusionem, vel, si mauis, cum principiis ante iactis male connectentem propositionem. Atque haec, vt iam ante monui, non ideo afferro, vt villo modo Virum Celeberrimum incuriae, vel ex errore, quem forsan in demonstrando commisit, Eum Ignorantiae et inscitiae in Iurisprudencia accusarem. Absit a me impudentia ista! Quis in tanta Iuris incertitudine, in tanta hypothesium varietate errare non posset aliquando et admittere? quae cum prioribus minus bene cohaerent. Nullum fere Iuris scriptorem maioris operis ab hoc labe immunem esse iudico. Ideo enim tantum paucis huius Viri tentamina examinanda putauī, ne Eum actu id iam praestitisse putent alii, cuius contrarium ego asserui, et simul pateat melius esse, nuda allegatione Legis thesin suam probare, quam principiis, vel precariis, vel falsis, vel parum ad rem facientibus vti.

§. X.

Quod reliquum est, Vos iam, Viri Generosissimi Amplissimique huius Academiae Ciues, Commilitones O. O. Honoratissimi compello. Constitui mecum ex quorundam desiderio, absolutis lectionibus Iuris N. et Institutionum nouas aperire scholas, quibus celeberrimi HEINECCII Institutiones et BOHMERI Ius Digestorum explicarem, quos auctores ideo caeteris praeferendos putauī, quod optimam methodum, quae demonstratiuam imitatur, elegerint. Dabo igitur operam, ut definitiones horum auctorum explicem, eas adhibeam ad caeterarum definiti proprietatum veritatem adstruendam, non neglectis, ex morali Philosophia desumptis rationibus, ad Legum adstruendam aequita-

tem, si opus sit. Caeterum si occurrunt, tum in compendio, tum in explicatione theses, quarum nexus cum principis praemissis non tam euidenter pateat; cogitetis quales haec arti, non scriptori vel docenti imputanda esse. Plura non promitto, quam praestare audeo. Caeterum, quemadmodum nihil praetermissurus sum, ut debitam in tradendis Iuris principiis adhibeam diligentiam, ita vestra diligentia, vestraque frequentia eam excitatum iri, praesentio. Dabam Kiliae M DCC XXXV.
d. XVI. Maii.

